

Na osnovu člana 135. stav (3) tačka d) Zakona o visokom obrazovanju („Službene novine Kantona Sarajevo“, broj: 33/17, 35/20, 40/20 i 39/21), člana 104. Statuta Univerziteta u Sarajevu, po prethodnoj saglasnosti sekretara, Vijeće Fakulteta na sjednici održanoj 09.11.2021. donosi

PRAVILNIK O NAČINU KORIŠTENJA SOFTVERA ZA DETEKCIJU PLAGIJARIZMA NA DRUGOM CIKLUSU STUDIJA NA UNIVERZITETU U SARAJEVU-FAKULTET POLITIČKIH NAUKA

Član 1.

Pravilnikom o načinu korištenja softvera za detekciju plagijarizma na drugom ciklusu studija na Univerzitetu u Sarajevu-Fakultet političkih nauka uređuje se način korištenja softvera za detekciju plagijarizma (eventualnog prisvajanja tuđe intelektualne tvorevine/autorskog djela i potencijalnog plagijarizma) (u nastavku: Pravilnik) koji se primjenjuje za provjeru svih završnih radova za studente koji studiraju na drugom ciklusu studija, studente magistarskog studija na Univerzitetu u Sarajevu- Fakultet političkih nauka (u nastavku: Fakultet) kao i obrasci za postupak provođenja postupka provjere korištenjem softvera.

Član 2.

Softver za detekciju plagijarizma ima za svrhu provjeru eventualnog prisvajanja tuđe intelektualne tvorevine/autorskog djela, bez obzira na postojanje indicije.

Član 3.

Stručne i tehničke poslove u postupku provjere plagijarizma obavlja Služba za nastavu i rad sa studentima, odnosno Stučni saradnik za IKT poslove.

Član 4.

Provjera završnih radova korištenjem softvera za provjeru originalnosti vršit će se na sljedeći način:

- nakon što kandidat preda zahtjev za ocjenu i odbranu završnog rada Službi za nastavu i rad sa studentima i radnu verziju završnog rada, dužan je dostaviti radnu verziju u roku od 24 sata elektronskim putem na e-mail adresu: web.administrator@fpn.unsa.ba uz ispunjen zahtjev za provjerom (PP1) .
- web administrator je dužan u roku od dva radna dana dostaviti rezultate provjere završnih radova na propisanom obrascu (PP2) imenovanim članovima Komisije za ocjenu i odbranu rada;
- rezultat provjere završnog rada korištenjem softvera za provjeru originalnosti dekanat dostavlja Komisiji za ocjenu završnog rada uz ostalu dokumentaciju potrebnu za sačinjavanje izvještaja komisije o ocjeni i odbrani završnog rada urađenoj,

Član 5.

Rezultat provjere završnog rada korištenjem softvera, obavezna je dio Izvještaja Komisije za ocjenu i odbranu završnog rada.

Član 6.

Svaki završni rad drugog ciklusa studija može iz tehničkih razloga provjeriti samo jednom.

Član 7.

Prilikom provjere završnog rada, u postavkama softvera za detekciju plagijata isključit će se tekst bibliografije. Ukoliko se ne radi o doslovno preuzetom citatu, može se tolerirati do 10 uzastopnih riječi, odnosno do 45 uzastopnih znakova. Postotak podudarnosti teksta od 5% do 15% prihvatljiv je samo ukoliko mentor po dobivanju izvještaja uspoređi sadržaj izvornog rukopisa sa završnim radom.

Postotak podudarnosti koji prelazi 15% preklapanja upućuje na ozbiljan rizik da tekst završnog rada sadrži plagirane dijelove. Mentor je u tom slučaju obavezan dodatno analizirati dobiveni izvještaj, uzimajući u obzir kontekst, specifičnost teme i druge okolnosti vezane za završni rad.

Ako se nakon dodatne analize utvrdi da je riječ o pretjeranom prijenosu izvornog teksta bez citiranja, rad se proglašava plagijatom, bez mogućnosti korekcije sadržaja. Procedura za takav završni rad se obustavlja, a kandidat/kinja se upućuju na uvrđivanje odgovornosti u skladu sa Statutom Univerziteta u Sarajevu.

Član 8.

Sastavni dio ovog Pravilnika čine dva utvrđena obrasca: PP1 i PP2.

Član 9.

Izmjene i dopune ovog pravilnika vrše se na način i po postupku propisanim za njegovo donošenje.

Član 10.

Nadzor nad primjenom ovog Pravilnika vrši prodekan za naučno-istraživački rad Fakulteta.

Član 11.

Ovaj Pravilnik stupa na snagu osmog dana od datuma objavljivanja na oglasnoj ploči Fakulteta i web stranici Fakulteta.

M.P.

DEKAN

Prof.dr. Sead Turčalo

Broj:

U Sarajevu, __ .__. 2021. godine

